

DOMENIE VIII «VIE PAL AN»

Antifone di jentrade cf. Sal 17,19-20

Mi à tignût sù il Signôr,
mi à liberât e puartât te largjure,
parcè che mi vûl ben, mi à salvât.

Colete

Diu onipotent, danus par plasê la gracie
che il cors dal mont al ledi indenant seont il to progjet di pâs,
e la tô Glesie e puedi servîti contente e cence pôris.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Os 2,16b.17.21-22

Tu sarâs mê par simpri.
Dal libri dal profete Osee
Cussì al dîs il Signôr:
«Ve, o tornarai a menâle tal desert
e i fevelarai al so cûr.
Li mi rispuindarà
come tai dîs de sô zoventût,
come la dî che e je vignude sù de tiere dal Egjit.
Tu sarâs mê par simpri;
tu sarâs mê te justizie e tal drit,
tal bonvolê e tal afiet;
tu sarâs mê te fedeltât
e tu cognossarâs il Signôr».
Peraule di Diu.

SALM RESPONSORIÂL dal Salm 102

R. Il Signôr al è bon e grant intal amôr.
Benedis, anime mê, il Signôr,
dut ce che al è in me il so non sant al benedissi.
Benedis, anime mê, il Signôr,
e no sta lassâ in dismentie nissun dai siei plasês. **R.**

Lui ti à perdonadis dutis lis tôs colpîs,
ti à vuarît di ducj i tiei mâi;
al à tirade fûr de buse la tô vite,
ti à incoronât di boncûr e di gracie. **R.**

Bon e di boncûr al è il Signôr,
pegri tal inrabiâsi e grant tal perdonâ lis colpîs.
No nus à tratâts daûr dai nestris pecjâts;
no nus à paiâts daûr des nestris colpîs. **R.**

Come che al è alt il cîl a preference de tiere,
cussì al è grant il so boncûr sun chei che lu rispîetin.
Come che un pari al à dûl dai siei fîs,
cussì il Signôr al à dûl di chei che lu rispîetin. **R.**

SECONDE LETURE 2 Cor 3,1-6

Vualtris o sês une letare di Crist componude di nô.

De seconde letare di san Pauli apuestul ai Corints

Fradis, scomencîno un'altre volte a racomadâsi di bessôî? O vino salacor dibisugne, come altris di lôr, di letaris di racomandazion par vualtris o di vualtris? La nestre letare o sês vualtris, letare scrite tai nestrîs cûrs, cognossude e lete di ducj i oms. Si sa che vualtris o sês une letare di Crist componude di nô, scrite no cul ingjustrî ma cul spirt dal Diu vîf, no su lastris di piere ma su lastris che a son cûrs di cjar.

E je cheste la fiducie che nô o vin in Crist, denant di Diu. No che o vedin il fiât di crodi in alc come che al vignîs fûr di nô, ma la nestre virtût e ven di Diu, che nus à fats servidôrs de gnove aleance, no de letare ma dal Spirt; la letare e cope, il Spirt al fâs vivi.

Peraule di Diu.

CJANT AL VANZELI cf. Jc 1,18

R. Aleluia, aleluia.

Te bondance dal so amôr

il Pari nus à fats nassi midiant de perauale de veretât,
par che o fossin la flôr des sôs creaturis.

R. Aleluia.

VANZELI Mc 2,18-22

Il nuviç al è cun lôr.

Dal vanzeli seont Marc

In chê volte, i dissepui di Zuan e i fariseus a jerin daûr a zunâ. Alore a rivin un pôcs e i disin:

«Parcè i dissepui di Zuan e i dissepui dai fariseus zunino, cu la cuâl che i tiei dissepui no zunin

gran?». Jesù ur rispuindè: «Puedino i invidâts a gnocis zunâ biel che il nuviç al è ancjemò cun lôr?

Fintremai che a àn il nuviç, no puedin zunâ. Al vignarà ben il timp che il nuviç ur sarà puartât vie, e

alore, in chê dì, a zunaran. Nissun nol cûs un blec di tele grese suntun vistît vieri; se no la tele

gnove, che e je stade zontade, e sbreghe chê viere e il sbrec al devente plui grant. Cussì nissun nol

met vin gnûf in bufulis vieris, ma vin gnûf in bufulis gnovis; se no il vin al fâs spreçâ lis bufulis e

tal ultin si piert vin e bufulis».

Peraule dal Signôr.

Su lis ufiertis

Diu, che tu nus dâs ce che nô o ufrin al to non

e tu metis l'ufierte in cont dal nestri servizi e suditance,

o suplichìn il to boncûr

che al diventi par nô un premi

ce che par tô bontât al ven segnât a nestri merit.

Par Crist nestri Signôr.

Antifone a la comunion cf. Sal 12,6

I cjantarai al Signôr che mi à judât,

o vuei laudâ il non dal Signôr, l'Altissim.

O ben: Mt 28,20

Ve che jo o soi cun vualtris ducj i dîs,

fin a la fin dal mont, al dîs il Signôr.

Daspò de comunion

Daspò di vênus sostentâts cul to regâl che al salve,

o preîn, Signôr, il to boncûr:
par che, cun chest sacrament che tu nus nudrissis tal timp,
tu nus fasis vê part de vite eterne.
Par Crist nestri Signôr.